

幼科鐵鏡卷之四

貴池夏
鼎禹鑄

痲症

夏禹鑄曰痘出於臟痲出於腑痲乃大腸主之毒氣蒸肺故發咳嗽先輩書未嘗齒及痲症蓋以其輕而忽之也卻不知表症雖輕毒侵肺腑亦多與鬼爲鄰予經歷甚衆費手居多因不惜筆力詳著於篇以杜嬰兒痲症之患流行痲症其候燒熱必發咳嗽聲必稍啞面皮微有腫樣兩腮顏色微紅此吉兆也如發出不快及不透發或紅點見面偶挾風邪而隱或醫人不知誤除燒熱隱而不見腹內作痛治之神莫神於天保采薇湯聖莫聖於天保采薇湯祇須一服即發出或不盡發者再加一服從未有不效者如肺臟先虛又加大腸毒氣攻肺面皮像澆薄的式子慘白

浮上光溜溜便是肺氣已絕在精威二穴對拿其聲不出必是死症藥之無濟

有麻方見點隨即收入或瀉青水審非風寒為害唇色慘白口氣微微此乃內虛不能送毒不可分利止瀉惟用八珍湯六九以託之外用葱半斤許白酒煎徧身擦之如再不透發祇額上稍見些微惟用六君子湯九循循調治自愈有麻初發熱時心火盛極刑剋肺金致麻不出必先黃連木通等分服之再用防風荆芥葛根升麻南星枳殼赤芍桑皮柴胡桔梗甘草煎服之即發

有痢疾兼麻症若麻見點急用香薷桔梗枳殼黃連厚樸木通升麻赤芍車前煎服麻瘡透發而治痢疾此棄輕從重之說不可不知

本邑陶一公涯玉之子麻症發熱方兩日醫人誤為除熱

痲伏不出形狀似驚差役請予治面色花雜喘急不嗽必有內毒於太陽穴以口涎擦之皮內隱有紅點知是痲毒內攻無燒不出用天保采薇湯倍加升麻乾葛一服額上見點色不紅起面色唇口慘淡無澤知爲內虛即用固真湯一服通身發熱陶公驚怖予曰痲非帶熱不出仍服天保采薇湯一劑通體透發愈此見面色花雜便知內毒之一驗也

培繼樓同學庠友方恒綏一子痲症隱而不出形症甚凶邀予治見其面色慘白口氣微冷唇舌淡白大便泄瀉即用八珍湯一服額稍見點恒綏因姪前痲症殞於泄瀉力迫止瀉予曰分利更虛不允見口吻間覺以瀉關性命勉強用五苓散果止而額上紅點即隱又用十全大補湯內託外用葱酒蒸引卒不透發予值事往郡躡後札示皮上

每發一泡破即成黑窟附他醫攻毒方單予札復曰肌肉脾屬破即成窟乃脾虛之極何可攻毒惟用六君子湯顧脾爲主果效此望色審竅萬無一失分利虛脾即此可見之一驗也

思誠堂同學友措大方薪衍第五郎患麻疹初醫者不知麻候用六一散以除燒熱邀予過治見其舌純紫兩唇燒裂大小二便皆祕聲嘶不已即用黃連八分木通黃柏各一錢服下大便刮白如冷痢然在座者口吻覺爲涼劑所致予亦踟躕滿志豈臟腑苗竅此症獨不相符毫不首鼠問前醫退熱所用何劑薪衍曰六一散予便恍覺下元爲六一寒冷所滯致火不降灼無疑矣隨以炒鹽久熨臍下仍用前味黃連倍加服之方下大便燥結與黑棗無異可見苗竅辨真治定不爽之一驗也

一辨傷寒

附寒極似熱

小兒之十指俱冷以三指按額俱熱身壯熱面赤而淡不動必掣此傷寒之症也表散法開天門分陰陽推三關體厚則大發其汗揉太陽並外勞宮運八卦推艮入坎症輕推之自愈重則用元宵火定之體弱隨發汗隨止女反是治用芎蘇飲六十服之

有寒極似熱者面色紅如水紅桃花口渴而脣不乾燥舌不紅紫大便秘小便清長此寒極也似熱者因面有紅色口有渴形故也治之與前法同

如口作渴大便秘小便赤是內有熱而外傷寒也宜先表外而後清裏爲主表用芎蘇飲六十裏用白茯苓半夏陳皮連翹木通枳殼甘草煎服

本郡田三公祖之公孫方二歲抱風寒燒熱症郡醫見燒

有驚悸便作驚症治數日不愈予以三指按額俱熱兒十指俱冷用芎蘇飲一劑留飲席未解內小童報曰小相公熱退矣此燒有表裏不可不辨之一驗也

予於癸丑科會試 盛京有鑾儀衛正堂許公乃孫方歲半患傷寒症初延太醫院幼科失表後於朝房內予同里員外郎陳是菴道及於予即日來貴池館親邀往治但見身冷如冰疲毛差差面色慘晦不知人事知否邪內伏用天保采薇湯一劑囑曰夜發熱則明日來治不則莫可如何矣夜果發熱仍用前湯一劑熱又解許曰發熱退熱藥同效異真出奇也予曰尋常症在表感一劑便解如令公孫邪被藥誤伏內昨一劑攻邪邪到肌表表見邪自是作熱仍以原方加追一劑表解熱除無甚奇也許曰前是菴備道年翁乃幼科白眉今若此洵名下無虛矣以百金壽

子辭曰晚兩代治救嬰兒從不受謝一文再四面壁更欲延請入太醫院又辭曰老母在堂晚在都門白雲頻望承盛意心領之可矣許乃止此關門殺賊之一驗也

方伯張存儒初生有公郎抱驚風患初郡中醫作夾食用消導劑症加甚後予用半夏四錢生薑一錢防風二錢一服即愈遂拜予爲假父此藥用當而通神之一驗也

予邑張中尊嫜患病邑中醫曾治十餘日不愈會予到邑中尊得聞接予治婢方抱出離座五六步外望見面上光光浮浮毫無寶色予曰不須抱近請回中尊問症若何予曰肺氣已絕不可治矣明日果死此望色而知爲死症之一驗也

一辨夾食傷寒

小兒十指俱熱我按兒額三指俱冷其候身熱或吐或瀉或

不吐瀉口必惡食腹必浮脹拍如鼓聲或作痛是也推法
開天門分陰陽男女同男重揉太陽發汗體弱揉太陰止
之女反是推上三關三十退腑六七下運八卦重揉良宮
於大指面旋推補脾曲兒小指重揉外勞於第二指大腸
位側推到虎口以止瀉不瀉不推重按掐中指一節以止
吐不吐不掐於左腳湧泉穴左轉揉之止瀉不瀉不揉少
頃右轉揉之止吐不吐不揉女則右轉右揉止瀉左轉左
揉止吐推畢即用燈火臍輪四焦胸口一焦用水酒麩一
枚火煨黃色研末白湯送下即愈重則用消導二陳湯十
九加柴胡紫蘇等味煎服

珩山孝廉方韻皇乃孫發吐燒熱微掣吐輕熱重予子壻
方平堦初業斯道投天保采薇湯一劑不效邀予一見知
爲內傷飲食外挾風邪用藿香正氣散一服即愈予以湯

名曰天保采薇取其治外治內之意用之不當雖多奚爲
在予壻以爲症屬內傷外感湯屬內外並治渠見不爲非
是然不知症似社鼠城狐重鎮何可輕發此學者之所宜
知而宜慎也

一辨腹痛

腹痛臍以上屬火臍以下屬寒其因不一有寒痛熱痛傷食
痛積滯痛氣不和而痛脾虛而痛肝木乘脾而痛蛔動而
痛數種寒痛則面白口氣冷大便青色小便清利痛之來
也迂緩而不速疾綿綿不已痛時以熱手按之其痛稍止
肚皮冰冷是也推法曲兒小指重揉外勞宮推上三關揉
臍五十藥用乾薑肉桂等分煎熱加木香磨水入服之自
愈

熱痛則面赤口氣熱口渴唇紅大便秘小便赤時痛時止痛

來迅厲腹形如常不腫不飽彈之不響以熱手按之其痛愈甚肚皮滾熱此真熱也推用下六腑水底撈月蓋熱痛主心脾兩熱用燈心車前伏龍肝加木香磨水稍許入服傷食痛者必惡食眼胞必浮腫或瀉下酸臭腹必飽脹彈如鼓聲或身作熱是也如氣不旺者不宜取瀉祇用消導二陳湯十九

積滯痛者今日傷明日傷逐日傷之而滯於脾胃間不以飲食得其傷不痛既有滯而後以乳食傷碍故痛也面色黃噯氣酸大便酸臭便後痛減足冷嗜卧不思飲食是也治宜枳殼檳榔木香下之下後即以小異功散十六補之氣不和而痛者兒下地後或地多溼兒臍受風以裹肚束臍過緊不知兒體漸長束帶未鬆則上氣不通下氣故作痛也審其非寒非熱問其母而臍果有束縛之弊則氣不和

之痛必矣治以木香磨水服之隨用燈火臍輪六焦臍下
氣海一焦心口窩一焦其痛即止大兒之氣不和者其候
眼胞不腫面色不黃飲食如故腹腫可如鼓聲搖其頭而
愛氣是也宜用木香陳皮枳殼甘草服之

脾虛痛者其候面無血氣微黃帶微白大便少而色白治以
補脾開胃為主用六君子湯九加橘皮

肝木乘脾痛者肝木尅脾脾虛不勝其尅則肝氣無所洩故
乘脾之衰而作痛也其候唇白口中色淡面多青色痛則
腹連兩脇重按其腹則痛止起手又痛是也治用四君子
湯三十加柴胡白芍

蛔痛者腰曲撲身口流清涎痛久不歇少頃又痛或一時或
二時而止或歇半日又痛面黃唇白此蛔痛也治用使君
子去殼火煨吃十餘粒少頃又吃即止以上嬰兒腹痛口

不能言何以知之蓋兒痛必哭無故而哭者痛也哭聲雄慘而雙眉蹙皺是也如使君子食之不止莫妙於苦楝子樹根皮約一二兩許水煎一茶鐘吃下蟲即盡出但體弱者不可輕用

又有一種奇痛一痛只大叫幾聲痛痛痛即抱胸暈死予家一婢犯此症先君在日子見將婢面撲地用冷水一盆以婢膝着水上於委中穴澆水狠拍粗筋腫起用銀針傍筋打入二鍼鍼出血流叫一聲痛即甦隨用冷水滾水各半連吃一二碗立愈記先君曰此急痧也與轉筋火差似如平常腹痛從未有一痛而即死者急痧之辨緊記在此夏禹鑄曰嘗觀內經有曰胃虛則吐胃熱則嘔此說殊屬大謬何也予屢屢見吐吐固虛常有熱嘔固是熱卻亦有寒此匪予非議前人蓋見之多而治之效也二症各有

虛熱不可拘執惟望面色唇舌之間紅則熱而淡則虛斷無有誤至於泄瀉出少而緩曰泄出多而勢急曰瀉泄則症輕瀉則重凡以所瀉之色驗之治無不效

一吐

胃虛發吐其候面白神疲不熱不渴口氣溫和而帶微冷額前微汗治宜助胃膏二十二

胃熱發吐面赤唇紅煩渴溺赤口氣蒸手宜用熟石膏七分八分研細末神茶送下

胃氣不和發吐其候惡食此由積滯在胃復爲傷食搗兒之頭便噉氣治用火酒麩一枚火煨黃色研細白湯調下用枳殼木香陳皮半夏香附服之

有盛夏外感暑氣吐者宜六和湯二十

有霍亂而吐者吐不出者手足厥冷臍腹之上絞痛名曰轉

筋火治用滾水一碗冷水一碗相和飲下即愈

有內傷飲食外感風邪而吐者身熱眼燒疲倦治用藿香正氣散七十

有傷風嗽吐者治用清金飲五八

一瀉

夏禹鑄曰吐從面色辨之不爽瀉更宜辨所瀉之色暴傾下迫屬火水液澄清屬寒老黃色屬心肺脾實熱宜清淡黃色屬虛熱宜補青色屬寒宜溫淡白色屬脾虛宜補醬色屬溼氣宜蒼朮燥溼酸臭屬傷食宜消導二陳湯十九

脾虛作瀉瀉下白色或穀食不化或水液澄清其候面白神疲脣口慘淡舌白口氣溫冷治宜理中湯五加附子或六君子湯九

脾熱作瀉瀉時暴注下迫便黃溺赤口氣蒸手煩渴少食治

宜五苓散干八加山梔仁

有氣虛下陷瀉者宜補中益氣湯其候與脾虛差同

有傷食兼滯瀉者其候噯酸氣吞酸脹滿一痛則瀉一瀉痛

減治宜用大腹皮神曲麥芽山查白朮香檳榔如食已

消痛已止而瀉不止者乃脾失清升之氣宜補中益氣湯

三七若食消而腹猶痛乃脾痛也宜小異功散十六

有肝瀉者瀉青稠粘乃肝木乘脾治宜麥冬桔梗白朮白茯苓

人參木香酸棗仁甘草

先瀉數日已止又瀉隨發驚此症多不可治蓋瀉而又瀉脾

敗之極加之外邪由肺尅肝肝又動風尅脾脾敗將死不

受肝尅故肝風烈極毫無泄處如祛風解熱元氣將盡將

謂療驚不能救脾將謂救脾驚不能止無法可治

一吐瀉

夏禹鑄曰內經有曰胃虛則吐脾虛作瀉脾胃俱虛吐瀉兼作此言極謬若先瀉後吐面白神疲不熱不渴額有微汗乃脾胃虛寒也宜理中湯五或小異功散十六或六君子湯九若先吐後瀉面赤唇燥煩渴溺赤乃脾胃有熱也治宜五苓散十八加竹茹煎服又有積滯在脾不能運化水穀而吐瀉者宜用消導二陳湯十九有長夏夾暑吐瀉者宜用六和湯二十

予髫年硯席友陳公載嫂患吐症適予抱風寒因延大方脈用溫胃劑吐益甚帶疾往視口唇紅艷氣出蒸手舌色紅紫用熟石膏二錢研碎神茶一碗送下稍止隨加一服立愈在大人苗竅尚驗况嬰兒乎後又患吐色竅俱同仍用石膏卻不甚應揣之下元或有寒氣用炒鹽熨腹仍服石膏即愈可見苗竅顏色從不一誤

予於歲癸丑北上到會館適陳是菴幼郎脾瀉將慢付予
治問曰曾服參否是菴曰如服一分將爬上了壁予心以
爲南北或亦有異轉思初到都門恐孟浪來請以六君子
湯去人參連服二劑了無一效辭接別醫良久一醫擁輿
至館去後予請所發劑視之劑屬消導因問彼何人斯是
菴曰此名震京都之鄭小兒科也予曰久瀉將慢尚可再
用消導之藥用之命不可知矣乃止予便不以是菴之言
爲正硬用六君子湯倍加人參且外加附子五分兩服即
愈是菴歎曰素聞妙手今果然矣此辨色審竅勿以人言
爲信之一驗也

一辨痢疾

夏禹鑄曰丹溪云痢無止法以通利爲主此言亦不盡然何
也痢疾有寒有熱白者虛寒也紅者實熱也治宜調脾爲

主若染一二日者徧身壯熱膿血稠粘裏急後重腹痛者
宜用承氣湯三五以下之或用木香檳榔丸二六若虛怯
者不可下病久身涼自汗宜用補中益氣湯二七挾熱而
痢純血宜用四順清涼飲二八或黃連芍藥湯十七挾冷
而痢純白或乳食不消者宜用理中湯五有溼熱之毒熏
蒸清道上致胃口閉塞而爲噤口者宜用人參黃連石蓮
子有痢久胃氣虛則不能乳食而爲噤口者宜用理中湯
五或六君子湯九有積毒之氣上冲而嘔惡者宜用人參
敗毒湯二九有胃氣虛寒而嘔惡者宜用附子理中湯五
有痢後脾虛不能制水而徧身浮腫者宜用六君子湯九
外加蒼朮厚樸猪苓澤瀉黃連芍藥有痢久脫肛者經曰
肺氣虛寒由脾虛而金無所養故大腸虛脫而下陷也宜
補脾溫胃用固腸飲六五有積盡而痢久不愈乃脾氣下

陷宜用補中益氣湯_{二七}或四君子湯_{二十}若初起宜用薑茶散_{三一}有夾暑熱而痢下赤白相兼者用清暑益氣湯_{六八}加香薷飲_{五五}

予長男之日五歲時與幼甥同患痢疾男素脾弱痢起腹並不痛痢下純膿白色中帶藍色口氣微冷不用通利即以六君子湯服之甥痢純紅徧身有風疹用四順清涼飲加防風柴胡兩藥各器同爐煎姻家誤以男藥與甥服之風疹即隱氣喘促睡斲予急以天保采薇湯與服疹復出喘止仍用前湯數劑愈此可見脾虛之極不必清利硬用補劑熱痢宜清不可用補之一驗也

一辨瘧疾

瘧疾皆由冒感風寒暑熱而發丹溪有曰若無汗要有汗以散邪爲主若有汗要止汗以扶正氣爲先此千古不磨之

至論也發時有一寒一熱身重骨節疼痛自汗多嘔者溼
瘧也由汗出脫衣衝冒風寒或渴極過飲冷水或冷水浴
身所致有食瘧者食所傷由飲食過度傷寒所致俱用柴
胡前胡青皮陳皮蒼朮白朮白茯苓甘草猪苓澤瀉知母貝
母厚樸半夏黃柏等分薑棗引服一劑以清之於發瘧日
之五鼓空心以前方加常山檳榔草菓仁等分煎服以截
之即愈如久瘧不止致中氣弱極名曰脾寒用四獸飲三
二加棗薑服五六劑自愈

夏禹鑄曰有陰虛似瘧竟作瘧治者這般人卻沒有一毫心
思一綫想頭夫謂之曰似則兩症相去原是星淵即曰似
瘧亦祇似其瘧之脾寒試問普天下人可有瘧一起而就
成脾寒者是必始於清之無法繼又截之無方或從不服
藥相延日久纔到脾寒之症明明有這一條來路若一見

每日下午身有潮熱冷狀颼颼便作瘧治獨不想到瘧有
來路况脾瘧由重減輕陰虛由輕加重兩症判然竟不知
別此一種心竅試取黑漆皮燈籠與之相况當耶否耶

陰虛似瘧如潮熱稍重於作寒治用四物湯四十加入參如
心肺肝有熱雖湯內已有熟地再加生地如作寒稍重
於潮熱四物湯外加黃耆人參甘草等分參減半如潮熱
作寒俱輕祇用四物湯不須外加如女患此加紅花二三
分

幼科鐵鏡卷之四終

貴池先哲遺書第二十七

[Faint vertical text columns, likely bleed-through from the reverse side of the page]

正百十四
幼科鐵鏡卷之五

貴池夏 鼎禹鑄

一辨咳嗽

夏禹鑄曰前書祇說風寒暑溼燥火六淫之邪氣侵肺皆令人嗽又曰五臟六腑皆有嗽非獨在肺此僅言咳嗽之大綱卒未透發六淫侵肺之顏色與臟腑俱嗽之分別予憶其故必從大方脈書上採來惟照脈論症故不說到六淫侵肺的顏色亦未分疏臟腑致嗽的根由即言一一形症俱屬模糊予把六淫侵肺臟腑皆嗽這八個字上一一體出形色歷藥不爽若風寒溼三邪侵肺其候面白而畏風燒熱而無汗或頭疼或鼻流清涕唇色晦闇痰涎白色或滑而易出小便清長便知為風寒與溼氣所侵宜用疏風順氣湯七一或清肺飲七二去白朮加防風便愈

火侵肺嗽與火炎無制相同方見後若燥侵肺嗽其候頭面汗出寒熱往來皮膚乾燥皮瘡搔癢大便閉結痰涎膠粘治宜潤肺清金之劑用麥冬貝母冬花黃芩防風麻仁甘草赤芍陳皮暑氣侵肺而嗽其候口渴唇淡治宜香薷厚樸扁豆加冬花麥冬至於六腑皆嗽之說殊屬大概予着實窮究六淫之外嗽又有五一順傳一逆尅一反侮一隔經傳染一水火不相交濟

順傳之嗽在脾胃不能生子金無土養故嗽漢武帝金鐘自鳴東方朔曰土其母也母喪則子鳴山必有崩者久之蜀郡有奏山崩以此悟之脾虛肺嗽乃一定之理其候唇口慘白氣弱神疲小便清短大便或溏瀉淡淡白色便知脾嗽治用六君子湯自愈九

逆尅之嗽在心心火盛則金被火傷而嗽試觀冶人爍金火

五十三
烈而金躍息火則金安嘗閱徐無猜地理闡宗書有曰如金星作穴火星作朝此外火尅內不爲吉穴須兩旁有水星山現則制火以救金始爲吉因此悟火尅金沸亦一定之理其候舌紅脣燥小便赤澀口氣蒸手便知心火尅金法惟瀉心用貝母陳皮甘草黃連木通杏仁麥冬五味等分燈心引煎服三四劑自愈

弱尅之嗽在肝肝有制伏肝始不旺如肺弱木強侮金則肺乃被侮而嗽星士家書云我尅者爲妻財乃知肝猶肺之妻也彼河東獅吼必因夫主柔弱便恃強侮夫肝侮肺嗽又一定之理其候目勇口苦宜用白芍柴胡冬花五味枳殼半夏甘草等分煎服五劑自愈

水火不相交濟之嗽由腎水不能上升則火炎無制乃上刑肺金而嗽猶之易之未濟離火居上坎水居下水不得火

而無功火不得水而功亦無所施水火不相交故難不得
其用若既濟則爲有用矣况五行惟火最烈故昔有慾火
無制口中吐出祆廟俱焚者由此觀之豈止嗽耶其症涕
唾帶血甚至血溢治宜滋陰降火湯四五二三劑自愈屢
治屢效案難悉載

一隔經傳染之嗽在胃胃有熱因染乎肺而嗽肺胃各經順
傳不到逆尅不及又不相侮胡爲亦嗽乃由胃肺逼鄰胃
司食入肺司氣出出入雖不同途卻共呼吸門戶胃熱熏
蒸波及肺竅所謂失火殃魚亡猿災木者是也其候脣紅
口紅作渴氣出大熱治用石膏冬花麻仁五味甘草以上
諸嗽如喘加麥冬天冬如咳有聲無痰加杏仁防風有聲
有痰加半夏枳殼

予於本經咳嗽外復將此五種旁引曲喻無非爲嗽雖出

四百六十一
自肺家而卻有隔經之嗽理實難明故不惜多方以譬明耳幸勿以卮言罪我

江平世業醫道地距四十餘里一孫咳嗽自藥不應以形色札白之予併來藥單乃瀉肺之味據曰面舌脣口皆紅小便赤色予札復示以瀉心之劑後聞三劑愈此心火刑金瀉心救肺之一驗也

一痘後

痘有專科痘中症候不載惟於痘後至緊要症附專數方

一泄瀉脣口淡白瘡靨平白小便清宜用六君子湯九

一痘靨平白宜用保元湯十一

一痘靨不落過者亦平白宜用八珍湯六九

一痘中眼内生翳子宜用兔糞焙之爲末每服三四錢白水送下服至升餘即散

一痘後瘡靨或紅腫紫腫黑腫急宜解毒用生地連翹歸尾

甘草赤芍等服三四劑毒自解

郡城孝廉危東原兩媿痘後一愆期不收一收後痘靨平
白俱有微熱邀予過治見脣口慘白氣出微微並用十全
大補湯服二劑熱除靨脫俱轉紅潤隨以保元湯十二調
服之愈此望色審竅知血氣兩虛之一驗也

一辨諸血

肺朝百脈之氣肝統諸經之血蓋營血者水穀之精氣也脾
胃有傷營衛虛弱故血失常道而妄行若氣虛氣弱神瘦
脣有血色者治法宜用四君子湯三十

血虛者精神照原脣舌無色治用四物湯四十加參朮糞前
見血爲近血用黃連解毒湯十七糞後見血爲遠血用清
胃湯四二久不止者用補中益氣湯二十加胡黃連

吐血者胃中積熱宜用麥門冬飲四一或清胃湯四二

衄血者脾熱傳肺而肺不能統血從鼻出宜六君子湯九加
桔梗當歸梔仁黃芩

咯血者腎虛也咯如牝雞喚乳雞聲嬰兒無此症

有咳嗽而吐血者庸醫多以童子癆治之誤矣此乃腎水心
火不相升降發炎無制治宜滋陰降火湯四五

夏禹鑄曰諸般失血有面色可審俱屬尋常惟血脫嗽血二
種症不多見附錄效案以憑較證予友陳公載姪女七歲
血吐數升身冷如冰通身筋現青色平常撲跌處青更甚
脣口慘白口氣微冷此乃氣虛血脫初大方脈作肺熱迫
血妄行用梔仁黃芩等味吐愈甚此固照理用劑卻不知
看色之妙後予用人參黃耆肉桂麥冬甘草白茯苓二劑而
愈此氣虛脫血望形審竅之一驗也咳嗽帶血方見咳嗽
類用滋陰降火湯四五屢用屢效症無疑二故不附案

辨中暑中熱

夏禹鑄曰前輩云動而得之爲中熱靜而得之爲中暑此言甚是然中暑與中熱病形無異中暑作渴中熱亦作渴中熱說詭話中暑亦說詭話若不細審形色雖得動靜二字究何益也如探中暑說詭話乃低聲平平而說中熱發狂雄壯而說此猶恐不得其真祇於口中一看舌色慘白脣無血色口氣微弱而冷便是中暑宜用清暑益氣湯六八立愈若脣舌皆紅氣出如焚小便赤澀定是心經中熱宜用木通薄荷煎湯再以犀角磨水一杯羚羊角磨水半杯入煎藥和服即解

己亥歲予從伯一孫方四歲患病初伯與先君交惡已久伯母呼予往治舉室阻撓且畏之曰彼孫一死禍來匪輕予曰具有兩眼不煩過慮視之口氣微微面色慘極脣舌

白淡口道誕話知爲中暑用清暑益氣湯一服愈

穿山郡庠方紹文僅一子乃子壻十七歲抱疾以予祇知
幼科延兩方脈共治彼見口說詭話便作熱治用盡犀角
連翹芩膏涼劑疾益加甚急聞於予予往見直卧如尸口
氣冰冷唇舌皆白乃中暑之症誤作中熱大可怪也用清
暑益氣湯一服立愈此大方脈切脈不如小兒科望色辨
竅爲妙之一證也

一辨夜啼

夜啼有六一面深紅多淚無燈則啼稍息見燈則啼愈甚此
心熱也遇火兩陽相捕故見燈而啼甚也其候手腹必熱
小便赤推用水底撈月引水上天河退下六腑及運八卦
推坎入艮藥用導赤散三加梔仁薄荷天麻

一哭多睡少天明則已面色青白便亦青白治宜溫下焦用

備急方七三

一爲異物所侵目有所視口不能言但睡中驚悸抱母大哭
面色紫黑治宜陳皮生薑茯神遠志甘草服此仍啼當審
其果不犯諸夜啼等症可將雜色紙作一異物狀令兒一
視即對兒以火焚之兒疑頓釋自不啼矣

一有脾胃兩虛吐瀉少食而啼者治宜用六君子湯九加炮
薑木香

一有心血不足而啼者其候睡濃忽悸舌色淡白而色不重
宜用安神湯四八

一有臟寒腸痛而啼者以手按其腹即不啼起手又啼此候
面必青手必冷口不吮乳治用當歸白芍人參甘草桔梗
橘皮等分服之外此而啼者必非病也或夜醒時爲戲燈
所慣無燈而啼者有之或乳母缺乳而啼者有之

一辨疴疾

疴者乾而瘦也此由寒熱失理飲食不節或因吐久瀉久痢久瘧久熱久汗久咳久瘡久以致脾胃虧損亡失津液而成也

心疴者面黃頰赤小便赤澀口舌生瘡煩渴治宜寧心丸五

肝疴者肌肉消瘦目胞赤腫翳生淚多白膜遮睛瀉多青色治宜肝疴丸五

脾疴黃瘦腹大或喫土喫米喫茶宜調脾湯十三

肺疴潮熱喘嗽鼻爛流涕宜先用清肺湯七次用化蠶丸五

疴腫者乃由疴久脾衰不能制水故頭面四肢發腫脹甚者褐子丸五三天喘者不治

丁奚腹大項細脯露翻食吐蛔宜蘆薈丸(十五)

一赤遊丹毒

此候由內有積熱重蒸外被風熱所感搏於血氣皮膚赤腫色如火灼或注頭上或發肢體卻非輕症入腹入腎亦能殺人宜速治之用升麻黃芩連翹各一錢大黃樸硝各二錢同煎服四五劑自愈

予同袍胡道生乃孫頭患丹火接予治用前方服二劑不退又以价來請予以札復曰此症非輕非一二服可愈宜重用各味五六劑定然見效後如數服愈前歲予宗人有一女患此症予囑曰此重症也不可怠緩不聽果死

淋症

有沙淋者腎水爲熱所結化爲沙石內塞水道沙出痛止治用五淋散(四六)氣淋者小腹脹滿小便澀滯而痛用瀉白

散三九血淋者心熱血散治用五淋散四六加小薊滑石
車前子寒淋者膀胱冷氣與正氣交爭寒戰而後溺治用
六味地黄丸干四加附子肉桂有心熱者用清心蓮子飲
五六腎熱者用六味地黄丸干四肝熱者用柴胡梔子飲
六四脾熱者用瀉黃散三八脾虛者用小異功散十六肺
熱者用瀉白散三九肺虛熱者治用小異功散十六加炒
山梔
以上心熱等七種淋症辦法在辨脾心肺肝腎之欸內求
之

便濁

尿白如米泔水久則成疳用人參甘草當歸木通猪苓赤芍
赤茯苓皮川萆薢治之

大便不通

肺與大腸有熱熱則津液少而便閉治用四順清涼飲二八血虛燥滯不通者治用四物湯四土加拍子仁松子仁胡桃仁等分服之

同邑紳徐梅宣公郎痘後四十日大便閉有七日他醫以承氣湯單授之子舅氏時在徐宅力薦請予往視之日血虛之極幸未通利通則不可藥矣梅宣且幸且疑硬用四物湯一服便出乃溏糞帶白色梅宣拍案叫絕曰一望即知神何至此前庸手幾敗乃事此望色審竅知非肺熱之一驗也

小便不通

小便不通由肺燥不能生水當清肺中之熱而滋腎水之源治宜用黃芩黃連天花粉知母麥冬茯苓木通甘草等分服之

四百八
若脾溼氣不上升當健脾生金先用瀉黃散三八隨用六君子湯九若膀胱有熱澀滯其流治用五苓散十八

出汗

出汗者寢中通身如浴覺來方知屬陰虛管血之所主也治宜四物湯四十加黃耆浮小麥黃連煎服有自汗者不時而出動則乃息屬陽虛衛氣之所司也治宜補中益氣湯二七加麻黃根浮小麥麥門冬煎服有脾虛泄瀉自汗而汗出有時者此症大虛治宜六君子湯九或附子理中湯五薑棗引煎服

黃疸

黃疸其候色黃屬脾蓋小兒由飲食所傷兼之溼熱之氣蘊積脾胃故成此症面目指爪小便徧身皆黃疸症無疑治宜地黃茵陳湯七

辨腫脹

腫脹之症有二一曰氣腫先腫而後喘由脾胃虛弱脾主肌肉肺主皮膚土弱不能生金虛氣上攻乎肺行於面目徧身浮腫也治宜調脾行氣爲主用五子五皮湯三七等分煎服輕則六劑重則十劑無有不愈

一曰水腫先喘而後腫因上焦煩渴喜飲茶水脾虛不能制水水反侮土上衝乎肺流走皮膚而光腫也治宜實脾利水爲主用胃苓湯二一又瀉後痢後瘧諸病後脾虛發腫者宜調脾胃爲主用六君子湯九或補中益氣湯二七切不可用通藥如通萬不能活如因瘧痢諸病後突然而腫脹者方從水氣二種治之此方即大方脈家用之亦無一不效如通身不腫只有腹腫彈之如鼓聲按之卻綿軟此脾虛也宜用六君子湯九加厚樸若腹腫彈之不響按

之如石此單腹脹也不治之症

三消

三消之症實熱者少虛熱者多不足之症也若作有餘治之誤矣始而心肺消渴或脾胃消中或腎水消濁傳染日久則腸胃合消五臟乾燥精神倦怠以致消瘦四肢

消渴心火動而消上上消乎心移熱於肺渴飲茶水飲之又

渴名曰上消治宜蓮花飲七四為主次以生津四物湯川

芎八分歸身一錢生地一錢酒洗知母一錢白芍一錢紙包

麥冬一錢心去川連八分烏梅肉五分天花粉七分薄荷

石蓮肉川黃柏炒蜜炙甘草炙各五分

消肌脾火動而消中中消於脾移熱於胃喜多食食無足時

小便色黃名曰中消宜用石膏知母甘草人參倍加石膏

外加粳米次宜生津養脾

消濁火動消腎移熱於膀胱小便渾濁色如膏脂名曰下消
宜用蓮子知母芡實麥冬入四物湯服之

凡消症務要養脾生肺降火滋陰病自除矣

總治三消以生血爲主用黃連天花粉二味爲末藕汁生地
汁生薑汁入乳並蜜共和二末爲丸每次一指而大白湯
送下

膀胱氣痛

嬰兒小腸與膀胱氣痛在臍下氣海兩邊筋腫到腎囊邊痛
不可抵治用川棟子橘核小茴香荔枝核俱焙炒爲末白
酒熱調三四錢一服不數服即愈

呆笑

兒無甚病忽然見人呵呵而笑即不見人亦然每日如是治
用桔梗三錢半夏五錢木通一錢甘草五錢煎服隨於頂

四百五十一
心百會穴灸二壯即愈

不寐多困

嬰兒不睡有二一心虛一膽虛睡中不聞人聲忽醒而不寐者此心血不足宜用人參安神丸四八有睡中稍聞人聲響動即驚而不寐者此膽虛之極宜用參竹湯七五

多睡者脾氣虛弱健運之令不行而嗜臥也治宜溫補脾胃以四君子湯三十加木香半夏倍加白朮

龜胸

由感風熱凝注為痰停心滯胸咳嗽喘促肺氣脹滿攻於胸膈漸成龜胸或乳母過食辛辣夏哺熱乳亦成此症治宜寬氣化痰丸六三

龜背

由客風吹背傳入於髓故背突如龜或咳嗽久以致肺虛腎

無所主腎主骨風寒乘虛而入於筋骨致精血不能流通故骨弓而駝治宜松蕊丹六三外以龜尿點脊背中中縫即愈

論解顱顙填顱陷

小兒生下頭縫不合腎主骨而腦為髓海腎有虧故不合也名曰解顱治宜六味地黄丸十四顱門之起名曰顱填宜大連翹飲四或瀉青湯五七顱陷如坑者由病久血氣虛弱不能上充治宜固真湯十又以狗骨炙為末雞子清調敷之

乾瘦似疳

兒父母平常節兒飲食從不傷脾飲食不缺欠又非病後但見逐日消瘦其症必由有所思想而難言或二三歲四五歲時母又有所生乳哺懷中多有疼愛之聲前兒從傍窺伺見其愛有所奪不能入懷吮乳惟朝思暮想久則傷脾

治之非藥所及此症前所未傳今不概見予先君在日子
妹歸寧見抱甥乾瘦審無他症頃見妹哺次甥長甥倚膝
覺神不在舍因問子妹瘦始於何日妹曰自得次甥後經
今月餘矣先君命妹哺兒之時勿令瘦甥得見哺後陽抱
入懷以空乳喂之且慰之曰我祇疼你如此一月果不藥
而肥追思先君妙何如也神何如也

天柱骨倒

天柱骨倒乃項軟也由真氣虛弱客邪入腑傳入筋骨項則
軟垂下而無力治宜祛風散四四或吐久瀉久病久而軟
者治宜六君子湯九加肉桂手軟者宜用薏苡仁當歸秦
芫棗仁防風羌活荆芥等分服之足軟者治宜六味地黃
十四加牛膝五加皮鹿茸等分服之

予從弟鐸禹懸孫方十箇月天柱骨倒弟曰弱極即要用

參子曰客邪入內何可遽用弟意不果予作色拒之用祛風散作煎劑一服項稍直即命用六君子湯外加防風五劑愈

五硬

頭頸手足強直如木乃肝受風邪治宜小續命湯五九

齒病口疳瘡

此病由胎中受熱而成口瘡或牙牀疳生走馬治宜導赤散
三並清胃湯四二如久病之後瘦弱之極難治之症

重腭重齦

口中上腭皮腫起如囊盛水名曰重腭牙牀腫起名曰重齦俱以大鍼刺破去血用蒲黃敷之

耳癰

耳內腫及耳外腫耳內出膿或間一日膿一出或間二日膿

一出治宜用黃鱔以刀斬斷滴血入耳數次或用天保采
薇湯

重舌木舌

重舌者舌下根復生如小舌也木舌者其舌腫硬填口也皆
由心脾熱極治用黃連竈心土木通連翹等分煎犀角磨
水和藥服之用樸硝紫雪白鹽每五分用竹瀝調敷即愈
予於丙午科同從弟鐸再從姪謨鄉試白下姪忽患重舌
弟伴向外科用刀刺破流出如雞蛋清歸寓又腫如此兩
回不愈予執舌乃心苗立方用黃連黃芩木通枳殼甘草
二劑舌消一半喉痰忽壅予揣必是誤用黃芩之弊蓋心
火刑肺肺已不安誤將肺瀉焉不壅痰於是去黃芩加五
味二錢一劑並愈此因苗治臟照症立方見藥不可誤用
之一驗也

鶴膝風

此候由腎氣不足兩腿細小膝骨腫大如鶴膝之狀治宜屈膝散六六或用六味地黄丸十四加牛膝鹿茸又有瀉痢久而成此症者紅腫作痛成膿治用補中益氣湯二十如腫硬不痛而色白者治不愈也

痛風

四肢上或身上一處腫痛或移動他處色紅不圓塊參差腫起按之滾熱便是痛風治用羌活獨活五加皮威靈仙秦艽防風桂枝前胡如下身加牛膝各一錢煎服數劑自愈邑庠方玉相幼子左手左足各曲貼肉痛屈不伸用前方煎服五劑愈如大人須用酒煮每夜儘量飲每味一兩五錢煮酒約五六斤飲畢即愈此予創方屢效不爽

冷水風

四百三十六
腳背上與指上及解溪鞋帶諸所塊痛不可言一痛幾死用青磚一塊火內燒紅以木桶盛之將老醋澆入磚上以大人手伴兒腳懸於磚上蒸之氣莽則將腳稍遠氣溫則就磚桶口以綿絮之類圍塞不令氣洩一蒸即驗如神

迅雷所驚

其候抽掣形狀與前驚無異祇手掌內橫直紋痕皆是深黃顏色此因驚膽其色故黃拿甦用鼓對兒輕輕敲起漸上加重重擊二三聲持去鼓以解疑即服參竹湯七五以寧膽

穿山林宅諱祥者一子四歲臘月被爆竹驚死拿甦如父母喚聲畧重又驚死與飲食時先以食示之再做聲便不驚其父亦業幼科投以棗仁遠志等味不效至予告其顛末予曰此膽家受病作心家醫誤矣予授以參竹湯二劑

愈

天庖瘡

此由風邪毒氣客於皮膚搏於血氣而生始生如湯盪作泡
一破漿出成瘡治用生地升麻藍葉山梔大黃各一兩剉
碎用猪油八兩文武火煎色變瀘去渣磁器盛之塗患處
癩瘡

其狀如粟粒色赤面瘡夏月多生頭面或徧身用天保采薇
湯一等分煎服

黃水瘡

由溼熱與血氣相搏其瘡初生碎小後有膿汁浸淫成瘡用
雄黃雌黃川烏各一兩松香三錢爲末亂髮一團燒灰存
性猪油六兩熬化再入三味煎至髮消盡以綿瀘去渣入
二黃攪勻盛器塗瘡上

惡核瘰癧

此患由風熱毒邪與血氣相搏鬱結成核如貫珠於耳項之間腫硬白色搖奪不動而有根者便是瘰癧或潰爛成惡毒如用藥多有不效莫妙於用燈火至易而至效予亦曾患此用燈焦兩次即愈今故以燈火焦法垂於身之背面圖如瘰在左則焦左邊瘰在右則焦右邊前自頸上耳腳下起離六分地一點一點直下乳次過脇上至肺腧穴到頸上耳後止在瘰上周圍亦焦第二次照原路空處補之便愈若祇有核而搖得動者便不是瘰癧初起紅腫便是癰疽不可作瘰癧治

偏墜

腎囊子或一箇腫大一箇小用香薷厚樸枳殼

薑汁炒

木通扁

豆生薑甘草車前葉煎服或用萬年青根約五寸去黑皮

搗碎白酒煎服不吃渣亦愈

莖腫痛並腎囊腫

莖即陽物如腫用黃連木通各一錢煎服即愈

腎囊腫如琉璃燈樣用塘內水上無根浮萍以篩盛之下用水一盆置篩於盆上烈日曬乾爲末每服二錢即消腫痛如用鍋焙萬萬不乾

灸霍亂

霍亂灸崑崙穴七壯起死神效

灸瘧母

瘧母灸肺腧穴各三壯背對臍穴三壯神效

灸脫肛

脫肛灸龜尾穴症暫用補中益氣湯十服此乃肺氣下陷

灸肚大青筋

肚大青筋堅如鐵石於臍之上下左右離五分地各灸二壯即消

灸犬傷

犬傷用青磚上青苔和牛糞搥爛如被瘋犬傷於患處艾灸三壯即愈

灸蛇傷

蛇傷於患處艾灸三壯

以上灸法俱用獨蒜截片遮患處盛艾於上灸之

疔瘡惡瘡癰疽膏異方

水粉 黃蠟各五錢 寒水石一兩研細 乳香二錢 蘇油三兩 先入

鍋滾過入蠟化開再入水粉共寒水石熬成入乳香攪勻

成膏貼之即愈

貼骨疔口掛角各疔瘡發背腦癰大人小兒同治丹

疔瘡發背腦癰鬢疽乳癰一切無名腫毒用飛龍奪命丹服之便有頭先不痛不癢者服之便痛便癢未成者內消已成者即潰其毒化為黑水從小便中出此乃惡腫毒中之仙丹用蟾酥乾者酒化三錢膽礬一錢海羊蟲二十箇雄黃三錢輕粉五分蜈蚣一條炙黃去首足麝香片腦各五分共為細末酒為丸如綠豆大每服三丸用葱白三根長二寸自嚼爛吐在男左女右掌心以前丸裹於葱內熱水酒三四鍾送下厚被蓋之取汗約頻飯之時再用熱酒催助汗出其毒即消如汗不出其毒乃重再服三丸汗出即效祇是發背疔瘡方可取汗此方予前於都門許宅香火院住持小西天喇嗎僧處傳來不論大小老幼人如有前患用之無有不效

幼科鐵鏡卷之五終

貴池先哲遺書第二十七

幼科鐵鏡卷之六

貴池夏 鼎禹鑄

藥性小引

醫家治病如經生制藝然病有表裏重輕猶題有大小搭截病有來路去路用藥有清源塞流之法猶題有上文下文作文有承上含下之規藥味猶貴詮題面之字眼藥性猶字眼義意之淺深體認不明便成差謬不觀之卜子夏乎於素以爲絢詩祇因一句滑讀過便不解爲字之義則醫家下學於百藥之性可昧昧焉而不一爲之究耶予前按症列單因病用藥固矣然茫不知性倘症變裁方向所措手爰約畧幼科常用百味之性列於篇左以便詳究以供採擇焉

藥性賦幼科摘要

寒性 犀角解乎心熱羚羊清乎肺肝澤瀉利水通淋而補

陰不足薏苡能理腳氣而風溼堪除車前子明目止瀉能清
小便瓜蒌子潤肺止嗽下氣寬中黃柏瀉膀胱而補腎薄荷
消諸腫以清風寬中下氣枳殼緩而枳實速療肌解表柴胡
次而乾葛先柴胡瀉肝止兩脇之痛枳實削積除久滯之痰
百部治肺熱於咳嗽可止梔子涼心腎而鼻衄最宜升麻力
消風熱發散瘡痲足陰引氣升陽導藥遊經有四麥冬清心
解渴專除肺熱清肺隱伏之火生肺不足之金箔乃鎮心
而安魂魄茵陳除溼熱而治胎黃石膏墜頭痛兼清脾胃天
冬定肺喘又潤心肝大黃能通閉結樸硝降火通關前胡除
內外之實痰滑石利六腑之澀結熟地黃滋腎水補益真陰
生地黃涼心火肺脾解熱赤芍藥行血而療腹痛煩熱亦解
白芍藥補虛兼瀉肝火新血能生香附子理氣有消浮退腫
之功知母滋陰乃瀉腎除蒸之用貝母清熱痰而利心肺寒

痰愈滯枯梗通肺竅而傳諸藥肺部引經黃芩瀉大腸之火
肺寒勿用常山攻痰結之味勦瘧尤強葶藶子止肺喘以通
水氣水藕節消瘀血而止衄紅大黃樸硝乃脾虛送死之鴆
毒黃連貝母乃寒痰伐命之斧斤

夏禹鑄曰大黃猶之一員猛將樸硝卻是偏裨如賊勢猖
獗負踞要衝用之舉旗折戟一不成功若民遭困苦之餘
平定安集尚恐不及亦輕爲調遣不惟無地樹功而且賊
梳兵篋輕用之害慘不可言果肺火焰天大腸毒結一用
則瞬息通關至於臟腑俱虛或氣虛腫脹誤用則掃盡元
氣不刃而殺人矣嗟嗟夜臺黑暗地獄之設舍殺人者其
誰此種堅牢疇能解脫一能筋斗翻來斬新日月縱有前
番罪孽是即向世尊讖悔便作光明會上一位大菩薩
熱性 生薑發散除乎胃嘔胃熱切不可用五味止嗽且滋

腎水初嗽不可遽加川芎能祛風溼清頭補血紫蘇力能表散不可助脾麻黃散寒邪以發表根止盜汗而固虛白朮消溼痰而溫胃利水道以強脾丁香快脾胃以止吐逆附子療虛寒大壯元陽當歸補虛以養血獨活祛風以治瘋厚樸溫胃且消嘔脹除痰亦驗肉桂可療冷瀉止汗如神橘紅皮開胃去痰導壅滯之逆氣山茱肉治頭昏暈止下部之遺精

夏禹鑄曰附子之性有富貴的力量用之貴小心謹慎譬之富貴家凶年發賑在細民既飢且寒者受之則雙眉喜溢如枯木逢春在廉介之士雖橫窺無壁壯氣不衰誤爲過問必髮直衝冠以是知脾氣兩虛元陽亡失虛極生寒體如冰雪口中寒氣逼人一用如石投水不特莫之逆也且同流溼就燥如祇虛而不寒即寒不到陰極地位形勢猶能自立一用如水投石不特莫之受也而且水火參商

是知宜用不怕朝夕不宜卻怕分釐語云恩不在大貴期當厄怨不在大祇怕傷心可為輕用附子者作一箴規

温性 木香理乎滯氣半夏主於風痰蒼朮燥脾去溼山藥脾溼能醫藿香葉止吐温胃能消喉響之寒痰欬冬花潤肺去痰又定久嗽之壅喘草果仁温脾胃以止瘧威靈仙宣風氣以除疼苗香卻膀胱疝氣之痛秦艽去肢節腫痛之風檳榔墜痰導水治痢疾之後重如神訶子生津潤肺療滑瀉之沉疴似聖防風祛風杜仲益腎橘核止腰疼疝氣之急痛麻仁潤肺及六腑之燥堅黃耆實腠理益元氣外固表虛之汗肉豆蔻温中止藿亂更助脾臟之虛生薑皮作消浮腫鈎藤鈎專定驚風

夏禹鑄曰黃耆之性温内分實腠理益元氣外固表虛之盜汗内託陰症之瘡瘍乃脾家氣分之第一種固虛藥也

故仲景有曰黃耆甘草以益元氣之內人參肉桂調和營衛之中人動曰提氣祇知道一箇氣字那知道人身上氣有兩種主乎脾者氣之元也主乎肺者氣之發也脾之元氣猶每歲之爲生爲長爲收爲藏內運之氣是也肺發之氣猶山嶽之晴嵐村落之烟霧溪壑之陰雲碧海之樓市外發之氣也不能分別兩種各有所司猥曰提氣嗟嗟黃耆何曾走着肺家又何曾理着肺氣把扶正氣的一味聖藥看壞了致令脾氣弱症卒不敢用不亦深可悼哉予推其故多因肺部有邪氣喘氣促那醫家不去清肺之邪而遽爲扶脾之氣適湊其會氣愈喘愈促便誣賴到黃耆身上不然黃耆與肺何涉而亦亂道提氣耶若以予言爲謬試到名醫處把黃耆溫內分實腠理益元氣固盜汗這幾箇字幾種性細問一番庶可脫離無間獄步入明鏡臺矣

平性 青皮利脾胃快膈削積天麻定驚癇燥溼祛風甘草
調燮陰陽解藥百毒生用乃瀉心經之火人參寧心潤肺助
胃開脾生津扶氣肺熱反來傷肺之憂南星去驚風痰吐之
苦棗仁有補心去怔之功大腹皮消浮下氣亦能和胃遠志
肉遺精能止而寧心木通猪苓並爲利水之神蓮肉醒脾更
有清心之妙白茯苓補虛勞心脾俱到白茯神寧心臟驚悸
能安麥蘖有入脾化食之力脾虛莫用小麥有止汗養心之
功浮者爲佳神麩消食恐傷脾氣百合止嗽兼斂肺虛連翹
瀉六經之火排卻瘡膿大棗有健脾之力中滿勿嘗烏梅治
便血瘡痢兼用竹瀝治痰壅寒滯宜防

夏禹鑄曰人參是凡間一種仙丹不肯救度惡人祇肯救
度善類若脾虛作瀉胃虛發吐心虛驚悸肺虛作嗽津亡
作渴氣虛失血病久成慢諸類用之如入芝蘭之室蓋善

與善相親也肺熱氣旺風邪熱邪燥邪火邪諸類用之如
入鮑魚之肆蓋邪正不肯並立也凡今之人因前庸手誤
用傷人相沿視爲鳩毒不深可恨哉臟有淫邪不可遽用
邪去正衰不可不用遽用者傷人不用者亦殺人也後之
君子一能聞經大悟作上乘禪師發囊普濟虛寒不須淨
土修因即并橘枝頭杏林葉底便結箇花宮裏天中天之
大波羅蜜也

幼科鐵鏡湯方

〔一〕天保采薇湯

羌活 前胡 半夏 陳皮 柴胡 赤芍 白朮

川芎 枳殼 厚樸 桔梗 蒼朮 升麻 葛根

藿香 獨活 甘草

〔二〕犀角解毒湯 治胎熱丹毒

犀角 赤芍 生地黃 白芷 甘草 連翹 荆芥

防風 牡丹皮 木通

〔三〕導赤散 治夜啼

木通 生地 甘草 竹葉 黃芩

〔四〕大連翹飲 治胎熱等症

連翹 赤芍 歸尾 木通 甘草 防風 荆芥

〔五〕理中湯 治胎寒等症

乾薑 白朮 甘草 人參若加附子名附子理中湯

〔六〕鈎藤膏治內弔肚痛

乳香 沒藥 木香 殭蠶共為九鈎藤湯下

〔七〕地黃茵陳湯治胎黃

生地 歸尾 猪苓 天花粉 赤芍 赤茯苓 茵陳

澤瀉 甘草

〔八〕芍藥湯治夜啼泄瀉

白芍 澤瀉 甘草 大茴 薄荷 木香 萊菔 生薑

〔九〕六君子湯治脾胃虛寒等症

陳皮 半夏 人參 白朮 甘草 白茯苓 生薑大棗引

〔十〕固真湯治慢驚四肢冷不省人事

附子 甘草 人參 山藥 黃耆 肉桂 白朮

白茯苓 薑棗引

十一保元湯 治汗多變慢驚 一方有肉桂

黃耆 人參 甘草 生薑 片三 大棗 一枚 水煎服

十二薑半散 治吐不止將成慢驚

半夏 生薑 肉桂

十三調脾湯 治脾疳

陳皮 白朮 丁香 人參 訶子 青皮 甘草

十四六味地黄丸 治腎疳

牡丹皮 熟地黄 白茯苓 山萸肉 酒蒸 去核 白澤瀉

懷山藥

右為細末煉蜜丸如桐子大空心滾湯送下

十五蘆薈丸 治丁奚哺露

蘆薈 人參 白朮 白茯苓 山藥 木香 陳皮

青皮 麥芽 神麩 當歸 各三錢 檳榔 二個 麝香 少許

右為細末猪膽打麵糊為丸如麻子大清水湯送下

〔十六〕小異功散 治先瀉後吐
脾胃虛冷

人參 白朮 橘皮 白朮 薑棗為引煎服

〔十七〕黃連芍藥湯 治先吐後瀉

黃連 芍藥 猪苓 澤瀉 白朮 白朮 甘草

〔十八〕五苓散 治吐瀉

猪苓 白朮 白朮 澤瀉 肉桂

〔十九〕消導二陳湯 導痰消食健脾

陳皮 半夏 白朮 白朮 蒼朮 神麩 香附

砂仁 甘草

〔二十〕六和湯 治暑瀉

陳皮 半夏 白朮 甘草 黃連 厚樸 藿香

香薷 加扁豆 木瓜

〔二一〕胃苓湯 治長夏暑瀉

澤瀉 陳皮 白朮 猪苓 厚樸 白朮 甘草 蒼朮

〔二二〕助胃膏 治胃氣虛寒嘔吐

人參 白朮 白朮 甘草 山藥 木香 丁香

藿香 砂仁

〔二三〕訶附丸 治飢泄

訶子肉 竈心土 黑附子

為末米糊丸如粟米大米湯下

〔二四〕十六味兒丸 治脾胃虛弱

人參 白朮 白朮 山藥 薏米 芡實 蓮肉

甘草 陳皮 山查 麥芽 砂仁 黃連 澤瀉

芍藥 連翹

右為末蜜丸如彈子米湯下

〔二五〕承氣湯 治裏急後重腹痛痢疾

樸硝 大黃 枳實 厚樸

〔二六〕木香檳榔丸 治食積

黑丑 檳榔 木香 神麩 大黃

右爲末生薑汁糊丸如粟米大米湯下

〔二七〕補中益氣湯

黃耆 人參 甘草 陳皮 白朮 升麻 柴胡 當歸

〔二八〕四順清涼飲 治中焦熱

白芍 當歸 生地 甘草 柴胡

〔二九〕人參敗毒散 治積毒嘔惡

柴胡 前胡 川芎 羌活 獨活 白朮 枳殼

桔梗 甘草 人參 生薑引

〔三十〕四君子湯 治脾胃不調等症

人參 白朮 白朮 甘草 薑棗引

三一薑茶飲 治赤白痢

陳茶 生薑 黃蠟 鹽 車前葉

三二四獸飲 治虛瘧

白朮 人參 白朮 草果 半夏 甘草 陳皮

烏梅 薑棗引

三三人參養胃湯 治瘧寒多熱少

陳皮 半夏 茯苓 人參 蒼朮 厚樸 草果

藿香 薑引

三四清瘧飲

柴胡 枳殼 青皮 半夏 白朮 黃芩 厚樸

猪苓 白朮 澤瀉 陳皮 甘草 貝母 知母

前胡

三五隨用截方 加常山草果檳榔薑引係加在前單煎服

三六參蘇飲

人參 蘇梗 桔梗 前胡 半夏 乾葛 陳皮

枳殼 杏仁 木香 甘草 茯苓 薑引

三七五子五皮飲治腫脹

蘇子 山查子 蘿蔔子 葶藶子 香附子 桑皮

橘皮 大腹皮 茯苓皮 生薑皮

三八瀉黃散治溼熱腫脹

赤茯苓 黃連 黃柏 黃芩 山梔 澤瀉 茵陳

三九瀉白散治腫熱

甘草 桔梗 陳皮 桑皮 地骨皮

四十四物湯調益榮衛

川芎 當歸 熟地 白芍

四一 麥冬飲 治吐血久不止

麥冬 黃耆 當歸 人參 五味子 生地

四二 清胃湯 治糞後見血

山梔子 生地 牡丹皮 黃連 當歸

四三 茵陳湯 治黃疸

茵陳 梔子 黃柏

四四 祛風散 治天柱骨倒

防風 甘草 羌活 細辛 黃芩 白芷 薄荷

當歸 川芎

四五 滋陰降火湯 治陰虛痰結

當歸 地黃 白芍 黃連 白朮 知母 天花粉

蓮子 黑元參 甘草 麥冬 燈心引

四六 五淋散 治血淋

赤茯苓 赤芍 山梔仁 條黃芩 當歸 甘草燈心一團

〔四七〕清脾飲 治熱瘧或熱多寒少

青皮 半夏 黃芩 甘草 白朮 白茯苓 柴胡

陳皮 草果 厚樸 薑棗引

〔四八〕人參安神湯 治心血不足 驚悸不安

麥冬 人參 當歸 黃連 棗仁 生地 茯苓

〔四九〕安神湯 治心血不足驚悸

人參 半夏 棗仁 茯苓 當歸 橘紅 赤芍

五味子 甘草 薑引

〔五十〕寧心丸

麥冬五錢 寒水石一兩 白茯苓 甘草 牙硝 山藥各五錢

硃砂一兩 龍腦一字

右為末煉蜜為丸如芡實大每服半丸砂糖水磨下如慢

症用人參白朮煎濃汁化下

〔五一〕肝疝丸

五靈脂 夜明砂 龍膽草 天麻 乾蟾頭 全蝎一個

蟬退 川芎 蘆薈 黃連 青黛 防風

右為末猪膽汁浸為丸麻子大每服十九薄荷湯下

〔五二〕化蠶丸 治肺疝

蕪荑 青黛 蘆薈 川芎 白芷 胡連 川連

蝦蟆灰各等分為末猪膽汁浸糊為丸麻子大每服二十

枚臨卧杏仁湯下

〔五三〕褐子丸 治疝脹

蘿蔔子兩一 青皮 陳皮 檳榔 赤茯苓 黑牽牛 莪朮

五靈脂各五錢 木香減半

右為末糊為丸綠豆大每服十五丸桑皮紫蘇煎湯或蘿

葡萄湯下

〔五四〕加味二陳湯

治夾暑傷寒吐瀉

陳皮 半夏 白茯苓 甘草 厚樸 香薷 黃連

山查 麥芽 神麩 木通 澤瀉

〔五五〕香薷飲

治暑熱

香薷 厚樸 扁豆 黃連

〔五六〕清心蓮子飲

治瀉血

麥冬 地骨皮 黃芩 甘草 白茯苓 黃耆 柴胡

車前 石蓮肉 人參

〔五七〕瀉青湯

治顛填

羌活 川芎 梔仁 龍膽草 當歸 防風

各等分

大黃 減半 竹葉引

〔五八〕清金飲

治傷寒嗽吐

前胡 杏仁 桔梗 桑皮 半夏 甘草 旋覆花

薄荷 陳皮 水煎

〔五九〕小續命湯 治剛柔痲病

麻黃 人參 黃芩 川芎 芍藥 甘草 杏仁

防風 防己 肉桂 附子

〔六十〕芎蘇飲

川芎 蘇葉 陳皮 半夏 柴胡 桔梗 枳殼

乾葛 白朮 甘草

〔六一〕瀉肝湯

車前 木通 生地 歸尾 山梔 黃芩 龍膽草

甘草 各五分

〔六二〕松蘿丹 治龜背

松花 枳殼 防風 獨活 各一兩 麻黃 前胡 大黃

桂心各五錢

為末蜜丸黍米大每服二十九粥飲下

〔六三〕寬氣化痰丸治龜胸

大黃三分杏仁 百合 木通 桑皮 甜葶藶 天門冬

石膏各五錢

右為末煉蜜丸黍米大食後臨卧白熱水化下

〔六四〕柴胡梔子飲

柴胡 山梔 白茯苓 川芎 白芍 當歸 丹皮

牛蒡 甘草等分水煎子母並服

〔六五〕固腸飲治久痢不止

木香 黃連 當歸 白芍 人參 白朮 白茯苓

甘草 訶子肉水煎

〔六六〕屈膝散治鶴膝

防風 薏苡仁 牛膝 苦參女便浸曬 何首烏男便浸曬

僵蠶 天花粉 荆芥穗各五錢 肥皂核肉一兩 鹿茸五錢

共為粗末每用三錢同冷飯團四兩牡猪油六錢黏米綠

豆各一撮水四碗煎至二碗分作二次溫服

〔六七〕猪乳膏治胎風胎驚

牛黃 硃砂各少許 取猪乳調抹兒口中

〔六八〕清暑益氣湯治傷暑煩熱

黃耆 升麻 人參 白朮 陳皮 神麩 澤瀉

黃柏 當歸 青皮 乾葛 五味 甘草水煎服

〔六九〕八珍湯

人參 白朮 茯苓 甘草 川芎 當歸 熟地

白芍 薑棗引

〔七十〕藿香正氣散治傷脾胃外感寒邪

藿香 紫蘇 大腹皮 陳皮 桔梗 甘草 茯苓

半夏 神麩 厚樸 白芷 薑棗引

七一疏風順氣湯 治風寒發喘

紫蘇 乾葛 桑皮 前胡 麻黃 杏仁 甘草 水煎服

七二清肺湯

白朮 茯苓 陳皮 薄荷 南星 桑皮 細辛

甘草 桔梗

七三備急方 治夜啼內疳

煎葱湯淋洗其腹又用艾絨烘熱包熨臍腹十數次其痛即愈

七四蓮花飲

甘草 知母 蓮花鬚 胡黃連 瓜蒌仁 五味子

人參 乾葛 白茯苓 生地 竹葉

〔七五〕參竹湯

麥冬 人參 竹葉 甘草 半夏 小麥 粳米
陳皮 生薑

幼科鐵鏡卷之六終

貴池先哲遺書第二十七

曩讀卓溪遺書因知爲推拿燈火之書與兩世經驗有得之書亦闡發先哲未傳之秘書也自推拿之術不傳知讀是書者鮮又自錢仲陽指紋之說興滑伯仁因之業醫者遵而行之數百年於茲矣卓溪叟獨斥爲醫家異教人咸疑之遵奉是書者益鮮不知三關指紋之說景岳已闢之於前謂爲無稽非夏氏創論也安東石氏復引經文釋之於后謂爲杜撰而夏氏三關不驗之說蓋非無徵是書也言近而旨遠辭淺而義奧語語是法字字是訣而尤以望形色審苗竅一篇爲醫學之真詮不僅當幼科書讀也世之業兒科者目不寓二聖之書復不諳六經之法四論不知五運不明貿貿然以專家自命者欺人乎抑自欺乎劉欒盦京卿博學多聞以通雅名於當世晚近於醫家言尤深思篤好擬重刊鄉先哲幼科鐵鏡一書以救時弊而宏仁術遂委漳以校讎之役因得復

繹是書而復有會悟焉退之曰莫爲之前雖美而弗彰莫爲
 之後雖盛而弗傳京卿是刻豈偶然歟江浦陳漳校竟謹跋
 自命皆燬入平林自旗平樓會京與對學定聞以戲
 聖之書對不敵六經之志四備不味正野不即賢賢然以專
 博學之真益不辭當以採書歸少壯之業良味昔日不與二
 而華莫請精長長字字長指而失以望求自審苗稂一益為
 而夏凡三州不無之指蓋非徒好書也吾世而首魁翰墨
 於我夏凡餘歸也交東西子天更得然文辭之然以歸為林對
 長書春益險不味三閣計始之始者出已關之然前歸為無
 之獲百字於茲矣重矣更歸孔然醫宋異婚入如珠之數本
 不為又自錢竹閣計始之始與散前才因之業習者盡而計
 他則於皆未則之採書也自辭拿之術不與味歸為
 之書也伏食林拿欲火之書與兩計歸歸下下之

右幼科鐵鏡六卷吾邑夏禹鑄先生箸攷北宋錢乙始以治小兒得名其藥證直訣一書屢有傳本亦不免闕略它如晁陳二氏所著錄有嬰童寶鏡小兒靈祕方小兒至訣小兒醫方妙選小兒斑疹論諸書世皆失傳 四庫所收小兒衛生總微論方二十卷祇有明刻初本近莫邵亭丈知見書目有金陳文忠小兒病源方論四卷儀徵阮氏景宋進呈本元曾世榮活幼新書訣證詩賦三卷元至正刻本皆非尋常醫家所可得見若夫時流綴撮之編坊肆猥囿之刻徃徃一知半解而舛鑿襍出其間求其精審謹嚴可法可程者殆稀如星鳳焉先生名鼎自號卓溪空精越人術尤研究幼科是書以望顏色審苗竅為大宗指而於驚癇瘵三證及熱瘡認法尤有心得雖麻證至輕亦必加以審慎迺至圖繪各穴豪不舛謬所載推拿俱屬必效燈火艾灸俱起死回生祕法而又立

說引喻以釋疑難閒附效案以資印證已方非經歷驗不輕
傳載丸散無從加減切忌妄投凡所筆之於書者皆由慎思
明辨探幽抉微而來無論知醫不知醫者皆宜家置一編而
非唯里閭晚進當鴻寶奉之也吾邑知醫者如志載明章涵
虛一第朱文泉良翰僧曉雲

國朝則吳邦彥章元弼諸先生所著惜皆不傳其章鼎臣先
生著傷寒註疏醫學淵源及醫案編姚文清先生著醫學約
編均無傳本此書光緒乙未先叔蘇林閣學依譚丈文卿
制府關中刻本付梓於烟台榷署告歸後版藏江甯復成倉
宅中遭去年癸丑之亂付之劫灰今珩刻吾邑先哲遺書重
為刊行以廣其傳匪特景鄉賢之著述亦以承吾叔之志也
宣統甲寅三月二十有二日邑後學劉世珩謹跋